

Xujun xi kin'ekjǐhi xuta xi ntje Hebreo tjehe_n ra

B'ǐ ts'ín tís'ejña chji nga kinchjako_ná Ntǐaná nk'ie nga kits'ín nibá Ntǐhi

¹ Nkjin niyá kō kj'áǐ kj'áǐ ts'ín kinchjako_n Ntǐaná ntje cháná. Já profeta kits'ínchjén nga kinchja nǐstjin nk'ie.

² Tunga nǐstjin fekuhu xi kich'aá nd'ái Ntǐaná kits'ín nibá Ntǐhi nga j'ai nchjako_ná ngajoho. Kui Ntǐu xi kits'ínchjén nga kits'ínnda asuntee kō nk'a ján, kō kitsjáha nga kama ts'e ngayjee ni xi tjín.

³ Ajihǐn Ntǐu sakúchji kjuachánkaha Ntǐaná kō kui xi bakúchji kjuatík'uhun Ntǐaná. Kui xi ts'ín nga s'e ngayjee ni xi tjín tu ngat'aha nga'yún chánkaha éhen. Nk'ie nga ja kikjexínná ngatitsunná nga kits'ín jená nginkun Ntǐaná, ngjik'iejñat'aha Ntǐaná nk'a ján.

B'ǐ ts'ín tís'ejña chji nga 'yún nk'a tje_n Jesu nga ntítsjee

⁴ 'Yún nk'a kin'etsjen nga ntítsjee, at'aha tu nkuhú kui xi 'mi Ntǐhi Ntǐaná.

⁵ B'ǐ kitsúhu Ntǐaná nga kinchjako_n:

Ji xi Ntǐna,

an xi tsichu ma Na'mihǐ.

Ndaha nku ntítsje najmi b'a kik'ihǐn. B'ǐ ts'ín kinchjanǐjmíyaha Ntǐhi:

An xi kama Na'mihi,

kō kui xi kama Ntǐna.

Nk'ie nga b'a kitsú, najmi ntítsjee
kinchjaníjmíyaha.

⁶ Nk'ie nga kits'ín nibá Ntí tjuhun asuntee, b'í
kitsú:

Ngatentee ntítsjena kats'íntsjoho.

⁷ Kò b'í ts'ín kinchjaníjmíyaha ntítsjee:

Ntítsjena, kui xi xi nkúhu ntjo.

Kò xi ts'ínxát'ana, kui xi xi nkúhu njai nd'í.

⁸ Tunga b'íhí ts'ín kinchjaníjmíyaha Ntíhí:

Ntía ní, ji xi kuatexumai sín,

kò kuatexumai sisin nk'ie nga kuatexumai.

⁹ Tsjohi ni xi naxu tjín,

kò najmi sasíhin ni xi najmi nda.

Kui nga j'ajíhin ra an xi Ntíahí,

kò 'yún kitsjaha kjuatsjo nga xi tjíntujíhin.

¹⁰ Kò b'í tã kitsú sa:

Ji xi Ntía,

nga tuts'ihín ni kin'endai asuntee,

kò ntsai kin'endakohoni nk'a ján.

¹¹ Kfe ngayjee ni xu'bí,

tunga ji tu nkú kuinchunní.

Kama chá ngayjee niu xi nkú joyaha tsa najyun.

¹² Kama b'a n'eihí xi nkúhu nku najyun,

kò n'ek'óntjaiyai

xi nkú ts'ín n'ek'óntjaiya nku najyun.

Tunga ji bi najmi k'óntjaiyai,

kò ndaha nku nístjin najmi kama cháí.

¹³ Ndaha nku ntítsje najmi b'í kik'ihín:

Tinchint'ání má batexuma,

k'uentú maná xi fi kontrahi kinte tsukui.

¹⁴ At'aha ntítsjee bi, kui xi ntjo xi ts'ínxát'aha

Ntíaná. Kui xi n'e nibá tu xi basinkoho xuta xi
ts'íinkjáihín nga k'uanki.

2

B'i ts'ín tís'ejña chji nga tjíhin nga n'eshihín én xi kits'ín nibáná Ntíaná

¹ Kui kjuaha tjíhin nga 'yún n'eshihín raá ni xi kinu'yáá, tū xi najmi kuankín t'axíhin raá ni xi ts'e Ntíaná.

² At'aha santaha én xi kits'ínkjas'en ntítsjee kis'ehe nga'yún kō kits'ínkjáíhín chjí xi kanéhe ngayjee xuta xi kits'ín ngatitsun nga najmi kint'é'éhen éen.

³ Kui nga nd'aj, ¿nkú ts'ín kuitjunkiinná tsa najmi n'eshihín én chánka xi ts'ínk'ankiná? Tjun Nda Ntíaná kitsúya xi nkú ts'ín kuankihiná kō as'ai xi incha kint'éhe nga b'a kitsú kitsúya kixi ngáhaná kui niu.

⁴ Kō Ntíaná ta tsakúchji nga kjuaxi éen. Kits'ín ni xi bakúchji kjuachánkaha kō nga'yúhún kō nkjin tákj kjuankjún, kō xi nkú ts'ín mjehe kits'ínndzjoná kjuanda xi tsjá Espiritu.

B'i ts'ín tís'ejña chji nga xi nkúhu ñá j'ai ts'ín ma yjohó Jesu

⁵ Asunnte xi tíchubanijmíyahaná, xi as'ai nibáhá, najmi aya ntsja ntítsjee y'éjñaya Ntíaná, tsa kui xi incha kuatéxumaha.

⁶ Tjít'a xujun éhen Ntíaná má nga b'i kitsú nku xi kinchja:

¿Yáha xuta, nga najmi ndyjajihin kjuankjintak'uhín?

¿Á ch'axkihí rí xuta, yáha kui?

⁷ Chubahá 'yún kinte kin'e mai nga ntítsjee, kō kik'aihí kjuachánka kō nga chankjún.

⁸ Aya ntsja y'entuyái ngayjee ni xi tjín asuntee.

Nk'ie nga aya ntsja xuta y'éntuyá Ntíaná ngayjee ni xi tjín, ndaha nku ni najmi y'éjña ndái ma. Tunga nk'iehé nga chasehéé, yaá nga najmi ngayjee niu tjíntuyáje aya ntsja.

⁹ Tunga yanáá xi nkú ts'ín Jesu. Tu chubahá 'yún kinte kin'e ma nga ntítsjee. Kik'aihi kjuachánka ko tíyankjún at'aha j'ajin ngabayoo. Tu ngat'aha kjuandaha Ntíaná ngabayaha Jesu ngandaná kamaha.

¹⁰ Tu xi nkjin kamaha ntíhi Ntíaná xi sakúhu ra kjuachánka, Ntíaná xi kits'ínnda ngayjee ni xi tjín ko ngat'aha Ntíaná tjíntuhu niu, kits'ín nga ajihin kju'uun kama Cristo xi tjihin nga kama, tu xi ts'íink'ankihi xuta.

¹¹ At'aha xi ts'ín je xuta nginkun Ntíaná ko xuta xi n'e je, nkuhú maha Na'mihi. Kui kjuaha nga najmi ma subaha ra Ntíhi Ntíaná nga nts'e tsuhu ra xuta xu'bo.

¹² Tjit'a xujun éhen Ntíaná má nga b'a kitsú: Ji k'uenijmíhi já nts'é, ko ts'intsjoho ajihin xuta xi ma ñjakú nga ts'intsjohi.

¹³ Ko b'i kitsú ya:

Kama 'yún tak'an Ntíaná.

Ko b'a ta kitsú sa nginku niyá:

Á an ei síjñaka ntíhi Ntíaná xi kitsjána.

¹⁴ Xi nkú ts'ín yjoninte y'a ntí xi tíinchako Jesu, kui nga b'a ta kik'iehe. B'a kik'ie tu xi nk'ie nga kuayáha ts'íinkjehe xi batéxumaha ra ngabayoo, kui xi ndanindoo.

¹⁵ B'a ts'ín kits'ín ndáhi ra ngatentee xuta xi y'entuhu xi nkúhu xuta musu xi kich'atse at'aha kitsankjún ngabayoo.

16 At'aha tíjña chji chji nga najmi ntítsjee j'aisinko. Xi ntjehe ní Abraham y'aha ra, kui xi j'aisinko.

17 Kui kjuaha nga j'ai ts'ín maha yjoho xi nkúhu já nts'e, tu xi nginkun Ntíaná tsichu maha nku nda na'mi tíjñun xi ma nimaḥa xuta ko xi kixi fiko xáha, tu xi kama b'a ts'ín tsjáha ra chje Ntíaná nga k'uéchji ngatitsuhun xuta.

18 Kikie kjuanima ko kichjut'ayák'un. Kui kjuaha nga ta ma basinkoho nd'ai xi chjut'ayák'uhun.

3

B'i ts'ín tís'ejña chji nga 'yún nk'a tjen Jesu nga Moise

1 Kui b'a maha, já nts'e, jun xi kin'e jenuu ko j'ájinnuu Ntíaná nga kjuáts'enuu, n'enkjíntak'un si-siun yáha Jesu. Kui xi y'éxáha Ntíaná ko kui xi nda na'mi tíjñun xi s'ejinná.

2 Kui xi kixi kits'ín nginkun xi kitsjá xáha, xi nkú ts'ín Moise ta kixi ngjiko xáha ajihin ngayjee xuta xi ts'e Ntíaná.

3 'Yún chánka sa kjuachánka xi kikanéhe Jesu nga xi kikanéhe Moise. B'a kama xi nkú ts'ín 'yún chánka sa kjuachánka xi ts'ínkjáihin nda xi ts'ínnda nku ni'ya nga kjuachánka xi sakúhu ni'yoo at'aha tsjo tjín.

4 Tu má ni'yahá ni, tjín xi ts'ínndaha. Tunga ngayjee ni xi tjín, Ntíaná kits'ínnda.

5 Nku nda musu xi kixi ngjiko xáha ajihin xutaha Ntíaná kama Moise. Kui xi y'éjña chji ni xi kuitsu Ntíaná askahan.

6 Cristo bi, ta kixi fiko xáha, tunga Ntíhí tí'mi bi. Kui nga batéxumaha ra ni'yaha Ntíaná. Ko

ni'yoo, kui xi ñá nd'ai. Ni'yaá tsa tu nku ndjáhá kuinchajián ni xi ma 'yún tak'aán ko tsjo maná at'ahá tichuyáháá ni xi tsjáná Ntianá.

B'i ts'ín tís'ejña chji ni xi maha xi fi t'axíhín Ntianá

⁷ Kui b'a maha, n'esihín ruu xi nkú ts'ín tjí't'a ni xi títsu Espirituhu Ntianá:

Tsa nd'ai kuinú'yó ntaha,

⁸ najmi tu ndjá b'eyo animanu, xi nkúhu já xi kits'ínkj'a t'axín énna,

nistjín nga kikjut'ayák'unna nanki kixiu.

⁹ Yo kikjut'ayák'unna ntje chánu xi nkú k'an, ndaha tsa yachán nú kikie ni xi kits'ian.

¹⁰ Kui nga kits'inkjankohona xuta xi kis'e nk'ie ko b'a kixian:

“Ja kindyjajihín jái,

ko najmi mjehe incha k'úémajin ni xi ts'an.”

¹¹ Kui nga kama kjahanna

ko ts'intjusan ni xi kixian,

nga najmi kjuas'en xuta xu'bo,

má nga ts'ínkj'áíya xuta xi ts'an.

¹² Chúhuun yjonu, já nts'e. Najmi tu kas'e ajinnu xi najmi nda tíya animaha, xi najmi s'ejihín, xi ngjuaj t'axíhín Ntianá xi tíña tík'un.

¹³ Tu sa ní xki nistjín b'i ngján tjen nga'yúhuun xinku nk'ie nga tíña sa nistjín xi títsu éhen Ntianá, tu xi ndaha nku xi tín ajinnu najmi k'uanachaha ra ngatitsuun ko ndjá s'eya animaha.

¹⁴ Tísakút'aná nd'ai ni xi ts'e Cristo, tunga tíhín ni nga tu nku ndjáhá kuinchajián xi nkú ts'ín kama 'yún tak'aán Ntianá nk'ie nga tuts'ihín ni. B'a n'ée santaha nistjín xi fekuhu.

15 At'aha t́ínchjako saná éhen Nt́ianá xi b'í ts'ín t́jít'a:

Tsa nd'ai kúinú'yó ntaha,
najmi tū ndjá b'eyo animanuu,
xi nkúhu já xi kits'ínkj'a t'axín éna.

16 ¿Yá xutaha xi kint'é tunga kits'ínkj'a t'axíhín éhen Nt́ianá? ¿A najmi ngatenteehé xuta xi tsitjuko Moise Egipto?

17 ¿Ko má xutaha xi kits'ínkjanko Nt́ianá yachán nú t́jihin? ¿A najmi xi kits'íhín ngatitsun? Kui xi kis'entu yjoninte k'iehen ante kixiu.

18 Ko nk'ie nga b'a kitsú kixi kixi Nt́ianá nga: “Najmi kjuas'en xuta xu'bo má nga ts'ínkj'áiya xuta xi ts'an”, ¿yá xi kits'ínkjó nga b'a kitsú? ¿A najmi xuta xi najmi kint'é'éhén?

19 Kui nga yahaná nga najmi kama incha jas'ehen at'aha najmi kis'ejihin Nt́ianá.

4

B'í ts'ín t́is'ejña chji nga xuta xi ts'e Nt́ianá kjuas'en ante xi má nga ts'íinkj'áiya

¹ Kui b'a maha, b'a t́itsu saha nd'ai éhen Nt́ianá xi t́itsuya t́itjun nga kuitjás'eén má nga tsjá Nt́ianá nga ts'íinkj'áiya xuta xi ts'e. Tunga t́jihín ni nga kjuántaha raá yjoná tū xi najmi s'ehe xi natsin k'úentu.

² At'aha ñá ta kis'enijmíná én nda tsuhu Nt́ianá. Kama xi nkú ta ts'ín kis'enijmíhi xuta xu'bo. Tunga máha kui, najmi tsakj'á kjuanda xi y'a éen at'aha najmi kis'ejihin én xi kik'inyaha.

³ Tunga ñá xi ja kis'ejinná kuitjás'eén má nga ts'íinkj'áiya xuta xi ts'e Nt́ianá. B'í kitsú Nt́ianá:

Kui nga kama kjahanna
 ko ts'intjusan ni xi kixian,
 nga najmi kjuas'en xuta xu'bo,
 má nga ts'ínkj'áíya xuta xi ts'an.

B'a kitsú ndaha tsa ja kama ndjuúhu xáha Ntíaná
 nistjin nga kits'ínnda asuntee.

⁴ At'aha b'i ts'in tjit'a xujun éhen Ntíaná ngat'a
 ts'e nistjin xi yatuu:

Nistjin xi ma yatuhu
 kama ndjuúhu ngayjee xáha Ntíaná
 ko kits'ínkj'áíya.

⁵ Ko b'a ta títsu ya:

Najmi kjuas'en xuta xu'bo,
 má nga ts'ínkj'áíya xuta xi ts'an.

⁶ Kui b'a maha, ndyjat'a sa xuta xi kjuas'en yo.
 At'aha xi tjun kis'enjímíhi én nda tsuhu Ntíaná
 najmi kint'é'én, kui nga najmi jas'eheh yo.

⁷ Ko kui nga ta y'éjñahá ngáha Ntíaná kj'ai
 nistjin, kui xi nd'ai. Askahan nga ja j'a nkjin nú,
 kits'ínkinchja David nga b'i kitsú xi nkú nga ts'in ja
 kab'et'á ei:

Tsa nd'ai kuinú'yó ntaha,
 najmi tu ndjá b'eyo animanuu.

⁸ At'aha tsa Josue kitsjáha xuta xu'bo nga incha
 ts'ínkj'áíya, najmi tjin xi nkú ts'in kj'ai nistjihin ta
 k'uéjña ngáha Ntíaná.

⁹ Kui kjuaha nga tjña sa nga ts'ínkj'áíya xuta xi
 ts'e Ntíaná xi nkú ts'in kits'ínkj'áíya Ntíaná nistjin
 xi yatuu.

¹⁰ At'aha xi kjuas'en má nga tsjáha Ntíaná nga
 ts'ínkj'áíya, kui xi ja kama ndjuúhu xáha xi nkú ta

ts'ín Nt̄ianá kits'ínkj'áíya nga ja kama ndjuúhu xá xi kits'ín.

¹¹ Kui nga n'ehená nga'yún nga kuitjás'eén má nga ts'ínkj'áíya xuta xi ts'e Nt̄ianá, tu xi najmi s'ehe ajinná nku xi kujjñe, tsa b'a ta ts'ín xi nkú nga kits'ín xuta xi najmi kint'één.

¹² Éhen Nt̄ianá najmi ni k'ien. Tjihin nga'yún. Kui xi 'yún yjo sa nga ngayjee kichá xi yjo nga jo ngaba. Nga masehen animaná ko espirituná fas'enjin nga bateya, ko nga masehen má tjixanyahá nintaná ko na'yuhu nintaná fas'enjin nga bateya. Base sisin ni xi n'enkjintak'aán ko xi nkú ts'ín tjíya animaná.

¹³ Najmi tjín ni xi kamanda xi najmi tibe Nt̄ianá. Tjintu chji chji. Najmi tjín ni xi tjintu'máha xi tjihin nga n'ekjas'eheén kuenta.

B'i ts'ín tís'ejña chji nga Jesu xi nda na'mi títjunná

¹⁴ Kui nga tjihin nga tu nku ndjáhá kuintchajihinná xi s'ejinná. At'aha tijnáná nku nda na'mi títjun chánka xi tsichu ndjiojmi ján, kui xi Jesu Nt̄ih̄i Nt̄ianá.

¹⁵ Ko Nda na'mi títjunná, kui xi mahá base nimaná nk'ie nga najmi ndjá tjíyaná, at'aha ko ta kui ta kichjut'ayák'un xi nkúhu ñá, tunga ndahá ichi najmi kits'ín ngatitsun.

¹⁶ Kui nga najmi tu jo jan kas'eyahaná nga kfink'úhúún Nt̄ianá xi batéxumaná ko xi tjihin kjuanda, tu xi b'a ts'ín kama nimaḥa ra ñá ko sakúná kjuandaha xi kuasinkoná nistjin nga un skuená.

5

¹ Ajihin xuta chj'ajin ngayjee xi ma nda na'mi titjun ko 'bai xaha nga kui xi tsjen titjuhun xuta nginkun Ntiana, tu xi tsaha chje ko ts'ink'ien chu tu xi kama ndyjat'aha ngatitsuun.

² Be xi nkú ts'in base nimaha xuta xi machjehen nga sakuyaha ko xi kindyjajihin, at'aha nda na'mi titjuun ta xutaha niu.

³ Kui nga machjehen nga ta tsaha chje xi ts'e tu xi kama ndyjat'aha ra ngatitsuhun, xi nkú ts'in ta tsja chjehe xuta naxinantoo.

⁴ Nk'ie nga b'i tsu xa xi ts'in joo, najmi kui b'et'a xa suba yoho. Ntia nina tsja xa xu'bi, xi nkú ta kamat'ain Aaron nistjin nk'ie.

⁵ Cristo bi, nk'ie nga kama nda na'mi titjun, najmi kui suba ts'asje nk'a yoho. Ntia nina xi b'a kits'in. B'i kitsuhu:

Ji xi Ntina,

an xi tsichu ma Na'mihj.

⁶ Ko b'i ta ts'in tjit'a ya ehén Ntiana:

Ji xi nda na'mi tu nk'ehé ni.

B'a ts'in tijna xahi

xi nkúhu xa xi ts'e nda na'mi Melkisedec.

⁷ Nk'ie nga y'ejna Cristo asunntej, animaha ngjik'aha ra nga kinchako Ntiana ko kikjanindzjo ntankun. Tsankihj Ntiana nga ts'inkj'a t'axihin ngabayoo, ko tsasinñju Ntiana ni xi kitsú at'aha tu xi kits'inkjas'ehén ra yoho Ntiana.

⁸ Ndaha tsa kui xi Ntiji Ntiana, tunga j'ajihin kjuanimaj. B'a ts'in kikiehe ni xi 'mihj nga nuú'yá'één.

⁹ Kō nk'ie nga ja kama xi t̄jihin nga kama, tsichu ma xi t̄ nkjéhé ni ts'íink'anki ngayjee xut̄a xi kuint'é'éhen.

¹⁰ Kō Nt̄ianá kits'ín maha nda na'mi títjun nga kitsjáha xá xi t̄jehen ra Melkisedec.

B'i ts'ín tís'ejña chji nga t̄jihin nga kfinndjukaá xi s'ejinná

¹¹ Ngat'a ts'e ni xu'b̄i t̄jín nkjún sa ni xi kuixín kai, tunga 'nihí t̄jín nga k'úejña chjiihi, at'aha ja najmi t̄a kits̄a mankjihinnu.

¹² Ja ní nd'ai t̄jihin nga kamo já maestru kai, tunga t̄u yje machjén sahanuu xi kuakúyanuu nku niya sa ni xi t̄jun binchiyáá éhen Nt̄ianá. Jun ja t̄a tsichu ma ngáhanu xi nkúhu nt̄inta xi machjéhen ntáchiki. Kui xi najmi nichine nda machjéhen.

¹³ Ngatentee xi baki, kui xi nt̄inta kō najmi kjee be má nihi xi naxu nginkun Nt̄ianá.

¹⁴ Tunga nichine ndoo, já xi chóo ma kjine. Kui xi ts'ínchjén tehente kjuankjintak'uhun kō mankjihin má nihi xi nda kō má nihi xi najmi nda.

6

¹ Kui b'a maha, ja kuichu chub̄a nga k'úentaá ni xi t̄jun binchiyáá Cristo, t̄u xi t̄u nku kfinndjunáá ni xi ndyjat'áná nga cháá. Najmi chubaha nga t̄a sakúya ngáhaná nga kfinchj'a ngáha raá animaná, kō tsa t̄a sakúya ngáhaná nga k'úentaá ni ch'onk'un xi ngabayoo fikóná, kō tsa t̄u nku sakúyaháná nga s'ejinná Nt̄ianá,

² kō ni xi ts'e nga mjenée ntsaá xinkjá nga saténtáá, kō nga ni xi ts'e nga kuichú n̄istjin nga

kj'uaíya ngáha ra xuta ngabayoo ko nk'ie nga kuasehe Ntíaná mí nihi xi kits'ín nga nkúnkú xuta.

³ Mjeni kuakúyahí ni xi ndyjat'ánuu. B'a n'eí tsa Ntíaná tsjánteni.

⁴ Xuta xi ja tsichu mankjihín ni xi ts'e Ntíaná ko kits'ínsjojín ni xi tsjáná Ntíaná, ko ta kisakút'aha Espirituhu Ntíaná,

⁵ ko kits'ínsjojín én ndaha Ntíaná ko nga'yúhún Ntíaná xi kama chji askahan,

⁶ tsa k'uéjña ni xi ts'e Ntíaná xi ja kikjut'a ngayjee ni xu'bi, najmi ta tjin xi nkú ts'ín kama tsetse saha, tsa ngjuaikj'á ngáha ra animaha. At'aha ta kuihi kuenta ts'e suba tíncha fát'a kruu xi ma jo niyá ngáha Ntíhi Ntíaná ko títsjante nga tíchajnuha Ntíhi Ntíaná.

⁷ B'a maha xuta xi yanki Ntíaná, xi nkúhu t'ananki xi nkjin niyá b'anehe ts'í. Tsjáha chan xi kjine xi ts'ínxásun t'anankiu, ko Ntíaná nda ts'ínko t'anankiu.

⁸ Tungá t'ananki xi tu jñáhá tsjá ko na'yá, ndaha tsa ts'íu b'anehe, kui xi najmi chumi ni chjíhi ra ko ni xi najmi nda nginkun Ntíaná bichú ma. Kui xi sakúhu nga kuiti.

⁹ Ko máha jun, já nts'e xi tjoní, ndaha tsa b'a ts'ín tíchubai, behe tak'uin nga jun xi sakúnuu ni xi 'yún nda sa. Kui ni xi y'aha ra nga k'uankiá.

¹⁰ Kixi ts'ín Ntíaná ko najmi ts'ínchaya ni xi kin'o ko xi nkú ts'ín tsakuchjúu nga tjonuu Ntíaná nk'ie nga nda kin'ekoo xuta xi ts'e nístjin nk'ie, xi nkú nga ta t'n'o santaha nd'ai.

¹¹ Mjeni nga tu nkú b'a n'enú santaha nístjin xi fekuu tu xi sakú kikjihinnuu ni xi tíchuyóho.

12 Najmi mjeni tsa kama ts'o. Tu sa ní b'a ta n'oo xi nkú nga incha ts'ín xi sakúhu ni xi kitsúhu Ntíaná nga tsjáha. Kui xutaha xi tu nkú s'ejihín ra Ntíaná ko maha kuyá.

B'í ts'ín tís'ejña chji nga ts'ín Ntíaná ni xi tsu

13 Nk'ie nga kitsúya títjun Ntíaná ni xi tsjáha Abraham, ta y'éjña nga ts'íintjusun ni xi kitsú. B'a kits'ín at'aha najmi tjin xi 'yún chánka sa, tsa kui xi ts'íinkie nga ts'íintjusun ni xi kitsú.

14 B'í kitsú Ntíaná: “An ts'ian nga nda kamat'ain ko an ts'ian nga ntje xi s'ehi 'yún nkjin kama.”

15 Kikuyá k'uk'un Abraham ko kui nga kits'ínkjáihín ra ni xi kitsúya títjun Ntíaná nga tsjáha.

16 Xuta, tu xi chaha ra nga ts'íintjusun ni xi túb'enda, nku xi 'yún nk'a tjen nga kui ts'ínkie nga ts'íintjusun éhen. B'a ts'ín najmi ta s'ehe én.

17 Kui nga y'éjñaha Ntíaná nga ts'íintjusun ni xi kitsú, at'aha kama mjehe nga skué sisihin xi ts'íinkjái'hín ni xi kitsúya títjun nga tsjáha ko nga najmi ts'ínk'óntjaiya éhen.

18 Ntíaná najmi maha b'anacha. Kui nga nga joo ni xi kitsúhu Ntíaná najmi maha b'óntjaiyaha, ko kui niu xi tsjá nga 'yúnná ñá xi kich'aá ni xi kik'inná nga n'ekjái'hín.

19 Nk'ie nga b'a ts'ín tichuyáhaá ni xi tsjáná Ntíaná, tísasíjña ntsjan ntsjan anímaná nga tíma 'yún tak'un xi jas'en santaha ante xi 'yún nkjúhún nínku xi síjña ndjiojmi ján.

20 Yo má nga jas'en Jesu ngajoná, nga ngji títjunná. Ko kui xi tsichu ma nda na'mi títjun xi nkú ts'ín tjehe ra Melkisedec. Najmi ma feya xáha.

7

B'i ts'ín tís'ejña chji xáha nda na'mi Melkisedec

¹ Melkisedec, kui xi kama nda reih̄i nanki Salem ko nda na'mi xi kits'ínxát'aha Nt̄ianá, Nt̄ianá xi t̄jña nk'a ján. Nk'ie nga ja t̄k'óya ngáha Abraham nga kits'ín nganaha já rej̄ xi ngji kjánk̄o, as'ai Melkisedec ngjikj'á niyáha ko nda kinchjane nginkun Nt̄ianá.

² Ko Abraham ta kitsjáha nku t̄kjá ngayjee ni xi kisakúhu.

J'áin Melkisedec, kui xi tsuhu ra “nda rej̄ xi naxu ts'ín”. Ko nda reih̄i Salem, kui xi tsu ngáha ra “nda reih̄i kjuajyu”.

³ Najmi yaha má nibaha ra. Najmi kis'ehe na'mi ko naa ko ntje chá. Kui xi najmi kitsin ko najmi k'ien, nda na'mi xi nkú nga ts'ín nda na'mi Nt̄ih̄i Nt̄ianá. Najmi maha feya xáha.

⁴ Chasoo xi nkú ts'ín 'yún chánka Melkisedec. Santaha ntje cháná Abraham kitsjáha nku t̄kjá ni xi kisakúhu nga ngji kjánk̄o já rej̄.

⁵ Tjít'a kjuatéxumaha Moise nga já na'mi xi y'aha ra ntjehe nda na'mi Levi t̄jhin nga ts'ínkjáih̄in nku t̄kjá ni xi sakúhu xuta, ndaha tsa xinkjín maha xinkjín, at'aha nkuhú ntjehe Abraham y'aha ra.

⁶ Tunga Melkisedec xi najmi ntjehe Levi y'aha ra, kui xi kits'ínkjáih̄in nku t̄kjá ni xi kisakúhu Abraham ko nda kinchjane nginkun Nt̄ianá Abraham, nda xi Nt̄ianá kitsúya titjuhun ni xi tsjáha.

⁷ Ko t̄jña chji chji nga 'yún chánka sa xi nda nchjane xinkjín nginkun Nt̄ianá nga xi nda chubantjái.

⁸ Nk'ie nga nku tíkjá toon ts'ínkjáihin já nà'mi xi ntjehe Levi y'aha ra, a xutahá xi ts'ínkjáihin kui niu, xi ndyjun nkiní kuayá. Tunga ngat'a ts'e Melkisedec b'a títso éhen Ntíaná nk'ie nga kui najmi k'ien.

⁹ Ko nk'ie nga Abraham kitsjáha Melkisedec nku tíkjá ni xi kisakúhu, ma b'a bixíaán nga ko Levi kítsjá, ndaha tsa Levi xi askahan ts'ínkjáihin nku tíkjá ni xi sakúhu xuta.

¹⁰ B'a tjín kjáihin at'aha Levi tíñajin sa yjonintehe Abraham nístjin nga j'aikjá niyáha Melkisedec, at'aha yaá nga Abraham xi ntje cháha Levi.

B'i ts'ín tís'ejña chji á nku nda nà'mi tíjün tsetse kamachjéhen

¹¹ Xuta Israel kits'ínkjáihin kjuatéxumaha Ntíaná nk'ie nga tjíhin xá já nà'mi xi y'aha ra Levi. Tunga najmi tsichukjuahá ra xáha já nà'mi xu'bo nga ts'ín nga kama xuta xi tjíhin nga kama. Kui kjuaha kamachjéhen nga j'aihi kj'ai nda nà'mi xi kik'aihi xá xi nkúhu xi ts'e Melkisedec, najmi xi nkúhu xi ts'e Aaron.

¹² Kui nga tsa tób'óntjaiya xáha já nà'miu, ta tjíhin nga ta n'ek'óntjaiya kjuatéxuma xi y'aha ra Moise.

¹³ At'aha xi títso éhen Ntíaná ei, xi k'uaihi xá xi nkúhu xi ts'e Melkisedec, kui xi y'aha ra kj'ai ntjehe xuta Israel má nga najmi kje bitjujin ndaha nku nda nà'mi.

¹⁴ Tíña chji chji nga Nda Ntíaná Jesucristo ntjehe Juda nibaha ra, ntje xi najmi kits'ínkjó Moise nk'ie nga kinchja nga s'e já nà'mi.

15 'Yún tíjña chji chji sa ni xi tíchubayaá ei. At'aha nda na'mi tsetse xi j'ai b'a tjín xáha xi nkúhu xi ts'e Melkisedec.

16 Najmi kik'ai xáha xi nkú ts'in tíjña kjuatéxuma xi títsuya má ntje cháha nibaha ra já na'miu. Kik'ai xá níhi at'aha tjihin nga'yún nga tíjña tík'un sín. Najmi maha 'me.

17 At'aha b'i ts'in tjit'a má nga tíchubanijmíyaha: Ji xi nku nda na'mi santaha tú nkjéhé ni. B'a ts'in tíjña xáhi xi nkúhu xá xi ts'e Melkisedec.

18 Kui b'a maha, tsichukjet'aha kjuatéxuma chóo, at'aha najmi kis'ehe nga'yún ko najmi tsasinkoná.

19 At'aha najmi kamaha kjuatéxumo nga ts'in nga kama xuta xi tihin nga kama. Tunga nd'ai 'yún nda sa ni xi tíchuyáá xi tsjáná Ntjaná, kui nga tibichúk'un tiñaha raá Ntjaná at'aha kui nij tíchuyáá.

20 Nk'ie nga kama ni xu'bi, Ntjaná kikjihín y'éjña nga kuitjusun.

21 At'aha nk'ie nga kik'ai xáha já na'mi xi ntjehe Levi nibaha ra, najmi Ntjaná kikjin y'éjña. Tunga ngat'a ts'e nda na'mi xu'bi, Ntjaná kikjihín y'éjña nga kuihí xi kama nda na'mi. At'aha b'i ts'in tjit'a má nga b'a kik'ihin: Ntjaná y'ejña nij.

Najmi ts'injo éhen nga b'i kitsú:

“Ji xi nku nda na'mi tú nkjéhé ni.”

22 Kui nga Jesu kits'ihin nga nku ni tsetse y'éndako ngáha Ntjaná. 'Yún nda sa kjua tsetse xu'bi nga kjua xi chóo.

23 Nkjin nkjún kama já na'mi xingisoo at'aha ngabayoo y'échjaha nga ngjuajndjuko xáha.

²⁴ Tunga máha Jesu, najmi kfet'a xáha at'aha tíjña tík'un sín.

²⁵ Kui kjuaha nga maha ra ts'ínk'anki síhin xi f'aik'úhun Ntíaná tu ngat'aha ni xi kits'ín, at'aha kui xi tíjña tík'un tu nkjéhé ni ko bankintjái xuta xi ts'e.

²⁶ At'aha machjénná nku nda na'mi títjun xi nkúhu xu'bi, nku xi je, xi najmi n'enijéhe ra tsa mí nihi, xi najmi chuntí, xi najmi kin'engujihin já ngatitsuun. Kui xi n'etsjoho ndjiojmi ján.

²⁷ Kui xi najmi tjíhin nga xki nístjin tjun tsjá chje tu xi n'endyjat'aha ra ngatitsuhun ko askan ngáha tu xi n'endyjat'aha ra ngatitsuhun xuto, at'aha b'a incha ts'ín já na'mi xingisoo. Nkuhú niyá kitsjá sín chje nk'ie nga kits'ínkjas'en yjoho.

²⁸ Kjuatéxumoo já na'mi títjun xi yjoninte y'a kitsjá xáha, tunga askahan nga kitsjá Ntíaná kjuatéxumoo, as'ai y'éjña nga kitsjá xáha Ntíhi. Kui xi kin'e ma xi tjíhin nga kama. B'a kik'ie sín.

8

B'i ts'ín tís'ejña chji xáha Jesu ndjiojmi ján

¹ Nd'ai tíjñaná nda na'mi títjun xi b'a tjín xáha, kui xi Ntíaná kitsjáná. Ngjik'iejñat'aha Ntíaná má tibatéxuma ndjiojmi ján. Kuihí ni xu'bi xi mjení nga choo.

² Kui xi tjíhin xá ante xi 'yún nkjúun, ante xi tíjña aya nínku najyunte xi kui kikjin. Kui xi Ntíaná kits'ínnda, najmi xuta.

³ ¿Má xi kui xáha já na'mi títjun? Chje tsjá ko ts'ínk'ien chu xi f'aiko xuta. Kui nga Jesucristo tá tíjñaha ra chje xi tsjáha.

⁴ Tsa ni xi k'úéjñaha ei asunntej, najmi ka ma ra nda na'mi kai, at'aha ja tjín já na'mi ei xi tsjá chje xi nkú ts'ín tjít'a kjuatéxumoo.

⁵ Njinku ni'ya najyunte xi kui kikjihin nk'a ján tjñña. Kui nga xi tjñña ei, kui xi ma joho. Yo má nga ts'ínxá já na'mi xi tjín asunntej. Ko yaá ni xu'bi at'aha nk'ie nga ts'ínnda Moise njinku najyuntee, Ntjáná b'a kitsúhu: “Nda nda chasej. B'a n'ek'íe sisin ngayjee xi nkú tjín xi tsakuhu nga tsichuk'unní asunntu tjennkiu.”

⁶ Tunga nd'ai 'yún nda sa xá xi kik'aihi Jesucristo nga já na'mi xi tjín asunntej. Kui xi kits'ínchjéhen Ntjáná nga y'éndako xuta ni tsetse xi 'yún nda sa, at'aha Ntjáná kitsúya títjun ni xi 'yún nda sa xi tsjáha xuta xi ts'e.

B'i ts'ín tís'ejña chji ni xi y'énda tsetse Ntjáná

⁷ Tsa najmi chumi nihí xi kindyjat'aha ni xi tjun y'éndako Ntjáná xuta, najmi kamachjén xi ma joho kai.

⁸ Tunga najmi kisasihín ra Ntjáná ni xi kits'ín xuta xi ts'e. B'a ts'ín tjít'a éhen Ntjáná: B'i kitsú Ntjáná: Kuichú nístjin, nga k'uendáka nku ni tsetse xuta Israel ko xuta Juda.

⁹ Ko ni tsetse xi tíxian nga k'uendá, najmi b'a joyaha xi nkúhu xi y'endáka ntje cháha, nga jakj'a ntsja nga kik'onsje ante Egipto. At'aha najmi ndjá tsinchajin ni xi tjun y'endáka, kui nga kits'in nga maha ra.

¹⁰ Kuichú nístjin nga kuihí ni xu'bi xi k'uendáka xuta Israel.

K'uejñájian kjuatéxumana kjuankjint'ak'uhun,

ko tə k'uet'á ʔsun animaha.

An xi kama Ntiaha,
ko kui xi kama xutana.

¹¹ Najmi tə b'i ngján kuakúyaha ra já nts'e,

ko tə ndaha xinkjín,

tə tʉ xi skuēhe nga an xi Ntiaha.

At'aha ngatentee skuena,

xi 'yún ndyjahə ko santaha xi 'yún cháha.

¹² An ts'inndyjat'aha ngatitsuhun,

ko najmi tə ts'inkj'áitsjehenna jéhe.

¹³ Nk'ie nga Ntjaná tít's'ínkjó ej nga nku ni tsetse

tíb'enda, kui xi tsuhə ra nga ja chá xi tjuun. Ni

xi ja chá xi najmi tə ndaha, kui xi ja najmi tə tse

kamaha ra ma.

9

B'i ts'ín tís'ejña chji xi nkú chjun ninku najyuntee

¹ Ni xi tjun y'enda Ntjaná kitsúya xi nkú ts'ín
tjihin nga n'etsjoho, tunga ʔsunnteihí kisasínjña
ante nkjún xi má nga n'etsjoho.

² B'i ts'ín kin'enda ninku najyuntee. Ante xi
tjuun, kui xi kik'in ante nkjún. Yo kisasínjña nd'í
setiʉ ko kis'ejña yámixa xi s'entusún ninkuan chje.

³ Ko ante xi tjíña ʔstun najyun xi ma joho xi
tjenchja aya ninku najyuntee, kui xi kik'in ante xi
'yún nkjún.

⁴ Yo kis'ejña nachan chje toonsine xi má nga
s'etísun ni xi sinjne. Ko yo tə kis'ejña kaxa tsje
xi kjijnuyjehe toonsine. Kui xi bakúchji nga
Ntjaná y'endako nku ni xuta xi ts'e, ko aya kaxo
kisasínjñaya chuťsín toonsine xi má nga kis'eya
nichine manaa, ko tə kis'ejñaya yánisehe Aaron xi
kitjuhu nts'én, ko ndjiote xi tjít'a kjuatéxumoo.

⁵ Asun kaxo kis'entusún jo xi yjaha tsjanka. Kui xi tsakúchji kjuachánkaha Ntíaná ko kitsjennéhe tsjankaha ante xi má nga Ntíaná kikjexín jéhe xuta. Ngat'a ts'e ni xu'bi najmi machjéhen tsa 'yún tse chubanijmíyaá nd'ai.

B'i ts'ín tís'ejña chji xá xi kis'ehe ninku najyuntee

⁶ B'a ts'ín kis'enda ni xu'bi, as'ai fas'en tehente já na'miu ante xi tjuun nga ts'íntjusun xáha.

⁷ Tunga máha ante xi ma johu, nku tutuhú nda na'mi tíjuun fas'en yo. Nku niyá fas'en xki nú. Ko nk'ie nga fas'en yo, tjihin nga ngjuaike jni tu xi tsjáha chje xi k'úechji ngatitsuhun ko ngatitsun xi tu ndyehé ra kits'ín xuta.

⁸ B'a ts'ín bakúchjihi Espirituhu Ntíaná nga nk'ie nga tjña sa ninku najyunte xi tjuun, najmi kjee yaha niyá xi bichú ante xi 'yún nkjúun.

⁹ Ngayjee niu bakú chubayaná xi nkú ma nd'ai. At'aha chje ko chu xi n'ek'ien najmi maha b'éya xi nkú ts'ín tjihin nga s'eya kjuankjintak'uhun xuta xi kui ni ts'íntsjokoho ra Ntíaná.

¹⁰ Najmi maha b'a ts'ín niu at'aha ni xi títsuhú kjuatéxuma xu'bo xi tu a tjent'ahá, tu ni chinehé y'aha ra ko ni xi s'i ko nga k'ái k'ái ts'ín ts'ín je yjoho xuta nginkun Ntíaná y'aha ra. Kui xi n'etjusun santa nkúhu nga k'ái k'uéjña ngáha Ntíaná.

B'i ts'ín tís'ejña chji ni xi kits'ín jnihi Jesu

¹¹ Tunga ja j'ai Cristo ko nd'ai kui xi nda na'mi títjun xi bangisjainá ni xi nda kjuaxi. Kui xi jas'en ninku najyunte xi 'yún nda sa ko xi nda kikjin, xi najmi xuta kits'ínnda. Kui xi tsuhu ra nga najmi asuntee y'aha ra.

12 Nkúhú n̄iyá jas'en ante xi 'yún nkjúun. Najmi jníhi chutentsu ngjiko yò kò t̄a ndaha jníhi ntí turu. Jní xi ts'e ní ngjiko. B'a ts'ín y'échjintjai síhinná.

13 Jníhi turu kò jníhi chutentsu kò nasuhu ntí turu xi kití, kui xi saténdzjojnúhu xut̄a xi najmi je nginkun Nt̄ianá, kò kjuaxi nga b'a ts'ín ma jehe eí asunntej.

14 Tsa ni xi b'a ts'ínin kui niu, ¿a najmi 'yúhún t̄ín saha nga'yún jníhi Cristo? Kui xi t̄ijn̄ajihin Espiritu xi t̄ijn̄a sín nk'ie nga kitsjá yjohò xi nkúhu nku ch̄je xi je nginkun Nt̄ianá. Kui nga jníhi Cristo ts'ín jehe kjuankjintak'unná, t̄u xi najmi t̄a n'ehená ni xi fikóná ngabaya nga t̄u sahá tsjénk̄ihí Nt̄ianá xi t̄ijn̄a t̄ík'un.

15 Kui b'a maha, Cristo k'ienntjáihi xut̄a kò b'a ts'ín kits'ín ndáih̄i r̄a ngatitsun xi incha kits'ín nk'ie nga ch̄j̄i saha r̄a ni xi t̄jun y'énda Nt̄ianá. Kò Cristo kits'ín nga kama ch̄j̄ih̄i r̄a ni tsetse xi y'énda Nt̄ianá, t̄u xi xut̄a xi Nt̄ianá j'ájihin kama ts'ínkjáín síhin r̄a ni xi kitsúya t̄it̄jun nga tsjáha.

16 Xi nkúhu xut̄a, kintehe ni nga kuayá, b'énda t̄it̄jun ni xi kama ts'e ntíhi. Tunga najmi kamahá n'ekjáihi niu tsa najmi t̄jun kuayá xi kitsjá niu.

17 At'aha n̄istjin nga kuayá xut̄a xi b'a kits'ún ch̄j̄ih̄i r̄a ni xu'bo, tunga tsa t̄ijn̄a t̄ík'un sa, najmi k̄je ch̄j̄ih̄i r̄a niu.

18 Kò b'a t̄a kits'ín Nt̄ianá. Jní t̄a y'éndakohò ni xi t̄juun. B'a ts'ín kama ch̄j̄ih̄i r̄a kui ni.

19 B'a kits'ín Moise nk'ie nga kitsúyaha ngay-je xut̄a nga nkúnkú kjuat̄exuma xi t̄jít'a xujun kjuat̄exumoò. As'ai jakj'á jníhi ntí turu kò jníhi chutentsu. Nt̄anijua kits'íntj̄jinkohò kò kitsungijin

tsanka xi ni ko yá isopo. Kui xi kits'ínchjén nga tsaténdzjojnúkoḥo ra jníu xujun kjuatéxumoḥo ko ta ngayjee xuto.

²⁰ As'ai b'a kitsú Moise: “Kui jní xu'bi xi títs'ín nga chjíhi ra ni xi tób'éndakonuu Ntíaná.”

²¹ Ko Moise ta tsaténdzjojnuhu jníu nínku nájyuntee ko ngayjee ni xi n'echjén yo nga n'etsjoho Ntíaná.

²² Xi nkú nga ts'ín tít'a kjuatéxumoḥo nga tu xi nku ni kama jehe nginkun Ntíaná, jníhí xi maha b'a ts'ín. At'aha tsa najmi ngjuai ndzjo jní, najmi tjin kjuan'endyjat'a.

B'i ts'ín tís'ejña chji nga Jesu kits'ínkjas'en yjoho ngandaná

²³ B'a ts'ín tihin nga kin'e je nginkun Ntíaná ni xu'bo. Kui niu xi b'éjña chubaya ni xi tjin ndjiojmi ján. Tunga máha ni xi tjin ndjiojmi ján, nku chje xi 'yún nda sa nga xu'bo kamachjéhen nga kin'e je.

²⁴ Cristo najmi ante xi 'yún nkjún xi ntsja xuta kits'ínndakoho jas'en, ko tsa nku xi b'a mama tjin xi nkú nga tjin xi kui kikjin. Ndjiojmi ján ní tsichu ko tíjña nginkun Ntíaná nd'ai ngandaná.

²⁵ Ko najmi jas'en ndjiojmi ján tsa tu xi nkjin niyá tsjáha chje yjoho, xi nkú ts'ín fas'en já na'miu ante xi 'yún nkjún nga xki nú fas'enko jní xi najmi kui ts'e.

²⁶ At'aha tsa nkjin niyá jas'en Cristo yo, nkjin ra niyá k'ien kai, b'aha ra nkúhu nga kamanda asuntee ko santaha nd'ai. Tunga nkuhú niyá tsakúchji yjoho nd'ai, nistjin fekuhu xi kich'aá nd'ai, ko kits'ínkjas'en yjoho xi nkúhu chje tu xi kits'ín t'axihin ngatitsuun.

27 Xi nkú nga ts'ín tǐjña nga ngayjee xutá tǐhin nga nkuhú niyá kuayá ko askahan chāsehe mí nihi xi kits'ín,

28 kui nga b'a tā ts'ín Cristo nkuhú niyá kitsjá yjoho xi nkúhu chje nga kikjexín ngatitsuun xutá. Ko nk'ie nga kj'uaí niyá xi ma johó, najmi kj'uaí tsa ngatitsun ts'íinndyjat'a. Xutá xi tíkuyá níhi kj'uaíkj'á.

10

B'i ts'ín tís'ejña chji nga nkuhú niyá kitsjá Jesu chje tu xi n'endyjat'aha ngatitsuun

1 Kjuatéxumaha Moise tu 'ya y'éjña chubayahá ni nda xi kj'uaí askahan. Najmi kui xi nda kikjiun. Kui nga kjuatéxumoo ndahachí najmi maha rá ts'íhin nga kama xi tǐhin nga kama xutá xi xki nú f'aik'úhun Ntíaná nga tā kuihi chje tsjá.

2 At'aha tsa xutá xi chje tsjáha Ntíaná nkuhú niyá kama je kai, najmi b'a tā kuitsuhu kjuankjintak'uhun nga jé tjeheñ ko najmi tā tsjáha chje.

3 Tunga chje xi tsjá ní xki nú, kui xi ts'ínkj'áitsjeheñ nga tǐhin ngatitsun.

4 At'aha jníhi turu ko jníhi chutentsu najmi maha kjexín ngatitsuun.

5 Kui b'a maha, nk'ie nga j'aihi Cristo asuntee, b'i kitsú:

Najmi kin'e mjei chu xi n'ek'ien ko chje,
kui nga nku yjoninte kin'ek'ahaní.

6 Najmi kama tsjohi chu xi s'etíje,
ko tā ndaha xi n'ek'ien nk'ie nga s'echjí ngatitsuun.

7 Kui nga b'a kixihinna: “Á an ei.

Ji Nt̄iana, jáa tu xi ts'intjusuhunna ni xi mjehi,
xi nkú ts'ín tínchjanijmíyahana xujun éhin."

⁸ Títjun b'i kitsú nga kinchja: "Najmi kin'e mjei
ko ta ndaha najmi kama tsjohi chu xi n'ek'ien
ko chje ko chu xi s'etíyje ko xi n'ek'ien nga
s'echjí ngatitsuun." B'a kitsú ndaha tsa b'a títsu
kjuatéxumoo nga xuta tjihin nga tsjá ni xu'bo.

⁹ Askahan b'i ta kitsú sa: "Á an ei. Jáa tu
xi ts'intjusuhunna ni xi mjehi." B'a ts'ín kits'ín
t'axíhin chje xi tjun kits'ínkjó tu xi y'éjñaha ni xi
kitsú askahan.

¹⁰ Ko at'aha kits'íntjusun Jesucristo ni xi mjehe
Nt̄ianá, kui nga tsichu ma jehená nginkun Nt̄ianá
nk'ie nga nkuhú niyá kits'ínkjas'en yjonintehē xi
nkúhu chje.

¹¹ Ngayjee já na'miu xki nistjin ts'ín xá xi kanéhe.
Nkjin niyá tu nku kuihí xáha xi ts'ín nga tsjá chje,
chje xi ndahachí najmi maha kjexín ngatitsun.

¹² Tunga Jesucristo nkuhú niyá kitsjá chje. Kui
xi kits'ínndyjajnu ngatitsuhun xuta ko tu nkjéhé ni
chjíhi ra. As'ai ngjik'iejñat'aha Nt̄ianá.

¹³ Yo tíjña nga tikuyá santa nkúhu nga k'uéntu
Nt̄ianá xi fi kontraḥa kinte tsuku.

¹⁴ Nkúhu chje kitsjá tu xi kamaha xuta xi
kík'áts'e xi tjihin nga kama ko b'a k'uéntu sín.

¹⁵ Ko Espirituhu Nt̄ianá b'éjña chjiná niu nga b'i
tsu:

¹⁶ Nk'ie nga b'a kama, títsu Nt̄ianá,
kuihí ni xu'b'i xi k'uendáka xuta xu'bo.
K'uejñájian kjuatéxumana kjuankjint'ak'uhun,
ko ta k'uet'á asun animaha.

¹⁷ Ko b'i ta kitsú:

Najmi ta ts'ínkj'áítsjen sahana

ngatitsuhun ko ni ch'onk'uhun.

¹⁸ Ko má nga n'endyjat'a ngatitsun, najmi ta n'ek'ien saha chü nga s'echjí.

B'i ts'ín tís'ejña chji nga tjihin nga kfinndjukaá ni xi tsjáná Jesu

¹⁹ Kui b'a maha nd'ai, já nts'e, ngat'aha ngabayaha Jesu najmi ta binchankjúhun raá yjoná nga kuitjás'eén ante xi 'yún nkjúun.

²⁰ At'aha Jesu kikjex'áná niyá xi f'atikjá najyun xi tjenchja ante xi 'yún nkjúun, nku niyá tsetse xi tíña tík'un. Kui najyuu, kui xi tsuhu ra yjonintehe Jesu.

²¹ Ko kui xi nda na'mi k'akuná xi basehe nínkuhu Ntíaná.

²² Kui nga ngayjehe animaná tjink'úhun raá Ntíaná ko najmi tu jo jan katumaná nga s'ejinná Ntíaná. At'aha ja kin'e je animaná. Najmi ta chüntí tjíyaha kjuankjintak'unná ko ja kin'e chunkoho ntánijua je yjonintená.

²³ Ndjá tinchajían ni xi tichuyáá, at'aha b'a ts'ín s'ejinná ko yaá nga ts'ín Ntíaná ni xi kitsú.

²⁴ Tinchísjai niyáá xi nkú ts'ín b'i ngjánhán kuisinkaá xinkíá tu xi s'e sahaná kjuatjo ko nga n'e saá ni xi nda.

²⁵ Najmi tu b'ejñaá nga kama ñjakúkaá xinkíá, xi nkú incha ts'ín k'ua. Tu sa ní b'i ngján tjen nga'yúhuún xinkíá, ko 'yún b'a n'e saá at'aha tíyáá nga tábichú tiña nístjin nga kj'uai Nda Ntíaná.

²⁶ Tsa ja yaá én xi naxu tjín ko tu nku tín'enáá ngatitsun, najmi ta tjín saha chje xi k'uai tu xi n'endyjat'aha ngatitsunná.

27 Nku tutuhú nkjúhún kjuá xi n'ená ndyjun nkiní chúyahaá kó nd'í xi tú xi 'yúhún xi ts'ínkjekóho Ntíaná xi fi kontraha.

28 Nistjin nk'ie, xi najmi ts'íntjusun kjuatéxumaha Moise, kui xi najmi ch'a ma nímaha nga n'ek'ien. B'a ma tsa jo kó tsa jan xi kuítsuya jé xi kits'ín.

29 Tsa b'a ts'ín nkjún tíjña kjuatéxumoo, ¿mí ni xi n'ehe xi t́basinne Ntíhi Ntíaná? ¿Mí nihi xi n'ehe xi tú a nihí tímaha jní xi y'éndakóho Ntíaná ni tsetse xi ts'ín jehe xuta xi b'a tít's'íun? ¿Mí nihi xi kamaha xi ch'on tít'suhú Espiritu xi ts'ínndzjo kjuandaha Ntíaná? 'Yún tse kjuanima xi ts'ínkjáihín xi b'a ts'íun.

30 Yaá nga b'í kitsú Ntíaná: “Ahán xi k'uasjé chjía, an xi tsjaha chjíhi.” Kó b'í tá ts'ín tjít'a ya: “Ntíaná kuasehe mí nihi xi kits'ín xuta xi ts'e.”

31 ¡Tú xí nkjúhún tjín nk'ie nga Ntíaná xi tíjña tík'uun ts'ínk'íechjí xi najmi benkjúhún!

32 N'ekj'áitsjohon yjonuu nistjin nk'ie, nk'ie nga as'ai kamankjihínnyu én nda tsuhú Ntíaná. 'Yún ndjá tsincho nga kin'e chúkjuo kjuanima xi kisakúnnyu.

33 Tjín nistjin nga ch'on kik'innnyu kó kin'e'unnnyu nginkun ngayjee xuta nantio, kó kj'ái nistjin ngáha tá kamakoo xuta xinkiu xi b'a tá kamat'ain.

34 Tá kama nimanuu xuta xi kjintuyá'yún kó kin'ekjón nga kichju'ánnyu ni xi tjínnnyu. Tsjo kamannnyu nga b'a kamat'on at'aha yo nga ndjiojmi ján tíjñannnyu ni xi 'yún nda sa xi najmi maha fe.

35 Tú nkú katuma 'yún tak'unnú Ntíaná, at'aha tsa b'a n'oo, chánka chjí xi n'ekjóhon.

³⁶ Tj́ihin nga n'e chúkjuo ni xi tímat'on, tu xi kama n'ehenu ni xi mjehe Ntíaná kò b'a ts'ín sakúhunu ni xi kitsúya tíjún nga tsjá.

³⁷ At'ahá b'í ts'ín tjít'a éhen Ntíaná:
Ndyja sa íchí nga kj'uaí xi tj́ihin nga kj'uaí,
najmi tá k'uandayaha rá.

³⁸ Xuta xi ts'an xi ja naxu nginkán
k'úejña tík'un tu ngat'ahá nga s'ejihin an.
Tunga tsa ngjuainjihistun,
najmi tá sasíhinna kui xuto.

³⁹ Ná najmi xuta xi finjihistun nga tífi xi má nga ndyja. S'ejin níná kò tíchuhún animaná.

11

B'í ts'ín tís'ejña chji ni xi 'mihí kò nkú tsuhu rá nga s'ejinná Ntíaná

¹ Nk'ie nga s'ejinná Ntíaná, ya kixiá nga n'ekjáihín ni xi tíchuyáhaá kò behe tak'aán nga kjuaxi ni xi najmi tíma chjiná.

² At'ahá kis'ejihin xuta xi kis'e nistjin nk'ie, kui nga nda ts'ín incha kichubanijmíyaha.

³ At'ahá s'ejinná Ntíaná, kui nga yahaná nga én xi tsitjuhu ts'a Ntíaná kits'índakoho asuntee kò mankjinná nga ni xi tíyaá kin'endakoho ni xi najmi ma chji.

⁴ At'ahá kis'ejihin Abel Ntíaná, kui nga kitsjáha rá Ntíaná chje xi 'yún nda sa nga xi kitsjá Cain. At'ahá kis'ejihin, kui nga Ntíaná b'a kitsúhu nga kui xi nku nda xi naxu kò kits'ínkjáihin chjehe. Kò ndaha tsa ja k'ien Abel, tunga títakú chubayaháná xi nkú ts'ín kis'ejihin.

⁵ At'aha kis'ejiḥin Enoc Nt̄ianá, kui nga Nt̄ianá ngjiko tik'uhun ra ndjiojmi ján ko najmi k'ien. Najmi ta kisakúhu, at'aha Nt̄ianá jakj'ájihinséhen. Ko kintehe ni nga kichjubé, nda ts'ín kichubanijmíyaha nga kits'ín ni xi kisasihin Nt̄ianá.

⁶ Tsa najmi s'ejiḥin xuta Nt̄ianá, najmi tjín xi nkú ts'ín sasihin ra Nt̄ianá xuta xu'bo. At'aha xi mjehe kj'uaik'un tiñaha Nt̄ianá, tjihin nga s'ejiḥin nga tjíña Nt̄ianá ko nga Nt̄ianá tsjáha ni xi nda xuta xi bangisjaihi.

⁷ At'aha kis'ejiḥin Noe Nt̄ianá, kui nga kint'é'éhen nk'ie nga Nt̄ianá kitsúya tíjuhun ra ni xi najmi kjee ma chji ko kits'ínnda tsutsu chánkoo nga kits'ínk'anki xuta xi ts'e. B'a ts'ín kis'ejñanehe ra xuta nga kfe, ko kisakúhu Noe nga naxu kama nginkun Nt̄ianá at'aha kis'ejiḥin.

⁸ At'aha kis'ejiḥin Abraham Nt̄ianá, kui nga kint'é'éhen nk'ie nga kichubaha nga ngjuai nanki xi ts'ínkjáihin askahan, ndaha tsa najmi be sisin má nga ngji nga tsutju.

⁹ At'aha kis'ejiḥin, kui nga y'ejñaha nanki xi kitsúya tíjuhun ra Nt̄ianá nga tsjáha, ndaha tsa y'ejña xi nkúhu nku nda xi xin nibáha. Ni'ya najyunte y'ejñayako Isaac ko Jacob, xi askahan ta ts'ínkjáihin ni xi kitsúya tíjuhun Nt̄ianá.

¹⁰ B'a kits'ín Abraham at'aha ja tjíñajin kjuankjintak'uhun nga nanki xi najmi ndyja k'uéjña, xi Nt̄ianá k'uénda ko ts'ínnda.

¹¹ Ko at'aha kis'ejiḥin Abraham Nt̄ianá, kui nga kik'aihi ra nga'yún nga kamaha na'mi, ndaha tsa ja chá nkjún ko nt̄i Sara, at'aha kis'ejiḥin nga Nt̄ianá ts'íintjusun ni xi kitsúya tíjuhun.

12 Kui nga nku nda xi najmi ta tjihin ra nga'yun yjonintehe, kui xi kis'ehe ntje xi b'a ts'in nkjin tsichu ma xi nkúhu niñu xi tjin nk'a ján ko xi nkúhu tsumi xi tjin andai ntáchak'uun, kui xi najmi maha s'exki.

13 Ngayjee xuta xu'bi incha k'ien nga najmi kits'inkjálhin ni xi kitsúya tíjuhun Ntíaná nga tsjáha. Tunga incha kis'ejihin ra ko kama chubayahá niu, ko b'a incha kitsú animaha nga kui xi xin incha nibáha ko nga tu tjímasúhún asunntej.

14 Xi b'a incha tsu, kui xi bakúchji nga nanki xi ts'e tjincha bangisjai.

15 At'aha tsa tu nku kama bahá ra má nga incha nibaha, kik'óya ra ngáha kai.

16 Tunga kama mjehé ra nku ante xi 'yun nda sa, kui xi tjíña ndjiojmi ján. Kui nga najmi ma subaha ra Ntíaná nga ya nga kui xi Ntíaha xuta xu'bo, at'aha Ntíaná ja y'éndaha nku nanki.

17 At'aha kis'ejihin Abraham Ntíaná, kui nga kitsjáha Isaac xi nkúhu tsa chje nk'ie nga kikjut'ayák'uhun Ntíaná. Kama k'un nga xi nkúhu nku chje tsjá ntí nku tutuhu, ndaha tsa ntíu kinchjajin Ntíaná

18 nga b'i kitsúhu: "Isaac y'aha ra ntje xi s'ehi."

19 B'a kitsú Abraham nga Ntíaná tjihin nga'yun xi má nga ts'inkj'áíya ngáha ra xuta ngabayoo. Kui nga kisakú ngáha ra ntíhi xi nkúhu tsa j'áíya ngáha ra.

20 At'aha kis'ejihin Isaac Ntíaná, kui nga nda kinchjanehe Jacob ko Esau nginkun Ntíaná nga kitsúyaha ni xi kama askahan.

21 At'aha kis'ejihin Jacob Ntíaná, kui nga kintehe ni nga kuayáha, nda kinchjane nginkun Ntíaná nga nkúnkú ntíhi Kuse. Kits'íntsjohō Ntíaná nga y'a'yúhún kō ya yánisehe nga tsisintjen.

22 At'aha kis'ejihin Kuse Ntíaná, kui nga kintehe ni nga kuayáha, kitsúya tíjūn nga kuichú nístjin nga kuitju xutá Israel ante Egipto kō kitsúya xi nkú n'ehe nintaha.

23 At'aha kis'ejihin xi cháha Moise Ntíaná, kui nga kingjáña 'maha ntíu jan sá tjihin nk'ie nga kitsin, at'aha incha kieke nga tsjo tjin ntíu kō najmi kitsankjún kjuatéxuma xi kitsjá nda reihī Egipto.

24 At'aha kis'ejihin Moise Ntíaná, kui nga najmi kits'ín yuhu nga ntíhi takjihin nda faraon k'úihin ra nga ja kama chá.

25 Kama mje níhi nga ta sakút'aha kjuá'un xi tíbehe xutaha Ntíaná kō najmi nga ts'íntsjojin kutju kjuatsjo xi tsjá ngatitsuun.

26 Kits'ínkjink'un nga 'yún chjí saha ra kjuanimā xi sakúhu nga kjuanchinā xi tjin ante Egipto, at'aha kikuyáha chjí xi ts'ínkjáihin askahan. Ta kuihi kjuanimā xi akahan sakúhu xi ts'ín nibá Ntíaná ngajohō.

27 Kō at'aha kis'ejihin Ntíaná, kui nga tsitjuhu ante Egipto kō najmi kitsankjún kjuakjahan nda rej. Najmi kits'ínkjehe k'un, at'aha b'a kama xi kieke Ntíaná xi najmi ma chji kamaha.

28 Kō at'aha ya kis'ejihin Ntíaná, kui nga ts'asjehe S'í Pascua kō kitsjákjua nga jní n'ek'ikoho ankjuaha ni'yaha xutá Israel, tu xi ntítsje xi ts'ínk'iehen ntí tjuhun xutá Egipto najmi ts'ínkoho ntí tjuhun xutá Israel.

29 At'aha kis'ejihin xuta Israel Ntiana, kui nga j'atikjaha Ntachak'un Niu xi nkúhu tsa nanki kixi. Tunga k'ienjinntáhá já jun Egipto nk'ie nga kama mjehe nga b'a ta incha ts'in kō kui.

30 At'aha kis'ejihin xuta Israel Ntiana, kui nga tsixuntuhu xjohō nanki Jerico askahan nga y'emandai xuta Israel yo yatu nistjin tjin.

31 At'aha kis'ejihin naská Rahab Ntiana, kui nga najmi k'iehen xi nkúhu xuta xi najmi kint'é'en, at'aha nda ts'in kits'inkjáihin já jun Israel xi tsichukase maña yo.

32 ¿Kō mí nihi xi xín sa? Tse nkjún ngjuaikona tsa kuinchjanijmíyahana nda Gedeon, nda Barak, nda Sanson, nda Jefe, nda David, nda Samuel kō já profeta.

33 At'aha kis'ejihin Ntiana jóo, kui nga tjin xi kits'in nganaha ra já rej, kō nga nda tsatexumaha xuta xi ts'e, kō nga kits'inkjáihin ni xi kitsúya títjun Ntiana nga tsjaha, kō nga kits'in nganaha xoo,

34 kō nga kits'ink'ienya nd'í xi tu xí 'yúhún, kō nga tsitjunkihi yjohō nga kis'ehe kicha, kō nga kitsjá nga'yúhún yjohō ndaha tsa najmi ta chukjuaaha ra, kō nga ndjá ts'asje yjohō nga kikján, kō nga tsanka tjenni já jun kontraha.

35 Kis'e jminchjin xi kits'inkjain tik'un ngaha ra xuta xinkjin xi ja k'ien. Kō tjin ngá xi un kikiehe nga k'ien, at'aha ante xi 'yún nda sa nga kj'uaíya ngaha ra mjehe. Kui nga najmi kits'in yuhu nga ts'ihin ni xi kik'ihin tu xi kama ndaíhi ra kai.

36 Kō ta tjin xi kichajnucha kō kis'ehe, kō santaha kis'e'yún kō kis'entuyá'yún.

37 Kō t̄jín xi ndjio kis'ehe, kō xi kichā'yá ki-tikjáha, kō xi kichā ndju kin'ek'ienkōho. Kō t̄jín xi y'emasún nga chubā kingjahá t̄jabaxíhín chutsankā kō xi ts'e chutentsu. X'an y'entu, kō kitsjennkí uncha, kō kin'e'uhun.

38 Y'emasún nanki kixiu kō ajin asunntu t̄jenkí. Y'entuyá t̄ixa ngijoo kō t̄ixa xi yja t'anankiu. Xuta xu'bi, kui xi 'yún nda kama nginkun Nt̄ianá. Asunntee najmi t̄jehen rā xuta xu'bi.

39 Nda ts'ín kichubanjimíyaha ngayjee xuta xu'bi at'ahā kis'ejihín Nt̄ianá, tunga najmi n̄istjihín kisakúhu ni xi kitsúya t̄tjun Nt̄ianá nga tsjáha.

40 B'a kama at'ahā kits'ín kuantaná Nt̄ianá. Najmi kitsjá nga nkuhú kui xuta xu'bo kama xi t̄jihin nga kama. Kama mje níhi Nt̄ianá nga tā ñja tā ñja kamakaá xuta xu'bo xi t̄jihin nga kamaá.

12

B'i ts'ín t̄s'ejña chji nga Nt̄ianá ts'ínk'a niyá xi t̄joho

¹ Kui b'a maha, kitsendáihíná xuta xi bakú chubayaná xi nkú ts'ín kis'ejihín Nt̄ianá. Kui nga t'entu t'axíhinná t̄u mí níhí ni xi ts'ín'áíná kō ngatit-sun xi mjehe k'ojennkiná, kō t̄jen nga'yúhuún yjoná nga kfin jahaná má t̄bankíaán.

² Nkuhú Jesu xi n'esihín. Kui xi kik'atuts'ihín nga s'ejinná kō ts'ín nga s'ejinná xi nkú ts'ín t̄jihin nga s'ejinná. Kikie t̄tjun kjuatsjo xi sakúhu kō kui nga kits'ihín nga'yún nga k'ient'á kruu kō najmi nkjún kamahā ngat'ahā kjuasuba xi kisakúhu nga b'a ts'ín k'ien. Kō askahan y'ejñat'ahā Nt̄ianá má nga batéxuma.

3 Chasē chubayohoo Jesu xi 'yún nkjún kits'ín chúkjuā nk'ie nga kitsújnu kitsút'ahā já ngatitsuun. Chasē chubayohoo, tū xi najmi kfentahanuu kō kfehe rā tak'un.

4 Tíbxkjankoo ngatitsuun, tūnga najmi kjehe sakúnuu ngabaya nga b'a tín'o.

5 Kō ja kin'echayo én xi tsjáníyánuu, xi títsuya nga jun xi ntíhi Ntíaná. At'ahā b'í ts'ín tjí't'a:

Ji ntína, najmi tū tohón mahi éhen Ntíaná xi ts'ínk'a niyáhi, kō najmi tū n'ekjehi tak'uin nk'ie nga ndjá kuinchjakohi.

6 At'ahā Ntíaná ts'ínk'a niyáha xi tjoho, kō bjáha ngatentee xi bichú ma ntíhi.

7 N'echkjuo nk'ie nga ts'ínk'a niyánuu Ntíaná, at'ahā Ntíaná tít's'ínkonuu xi nkúhu ntíhi. Ngatentee xi tí'mi nā'mi ts'ínk'a niyá ntíhi.

8 Tūnga tsa najmi ts'ínk'a niyánuu Ntíaná xi nkú ts'ín ts'ínk'a niyá ngayjee ntíhi, tū a ntínú ma, najmi ntí kikjihin jun.

9 Nk'ie nga ndyjaná, nā'miná xi tjin ei asunntei ts'ínk'a niyáná kō yankjáán. ¿Nkú ts'ín najmi 'yún kuínú'yá'éhen raá Nā'miná xi tijná ndjiojmi ján ma, tū xi sakúhuná nga kuintsuba tík'uhunná?

10 Najmi tū xí tsehé ts'ínk'a niyáná nā'miná. Ts'ín xi nkú ts'ín ma chubayaha. Tūnga nk'ie nga Ntíaná ts'ínk'a niyáná, ngandaná b'a ts'ín, tū xi b'a ts'ín tā je kamahaná xi nkuhu kui.

11 Kjuaxi nga najmi tsjo maná nk'ie nga tjin xi ts'ínk'a niyáná. Ma un níná. Tūnga xi b'a ts'ín 'bai niyáha, kui xi askahan b'ejñajin kjuajyu kō be xi nkú ts'ín naxu fiko yjoho.

12 Kui b'a maha, n'ehenu nga'yún. Tjen nga'yúhun ruu yjonuu.

13 Niyá xi naxu tjen tankíno, tu xi kamandaha tsuku xi nimat'a ko najmi ta ts'onki saha.

B'i ts'in tís'ejña chji nga najmi kfi t'axihín Ntíaná

14 Tinchísjo nga kas'ekonuu kjuajyu ngatentee xuta ko nga kjuaje tintsubajiun. At'aha xi najmi tijnajin kjuaje, kui xi najmi skue Ntíaná.

15 Nda nda chasoo nga najmi tu kas'e ajinnuu nku xi najmi ts'ínkjáihín kjuandaha Ntíaná, tsa xi najmi nda s'eyaha ko as'ai tsjá kjuasti ko ts'ín nga ajihín nkjin xuta ngjuaitse ni xi najmi ndaha.

16 Najmi tu kas'e ajinnuu xi chuba kjuántukohó xinkjín ko ta ndaha xi najmi skuenkjún Ntíaná xi nkú kits'ín Esau. Kui xi kama ntí tjun ko nga kui ts'ínkjáihín ni xi ts'e na'mihí, tunga nkuhú nichine kikatéñaha ni xi kanéhe kai.

17 At'aha yo xi nkú ts'ín askahan kin'e t'axín, nk'ie nga kama mjehe nga ts'ínkjáihín nga nda kuinchjanehe na'mihí kai. Ndaha tsa kikkintá nga tsangisjai niyá, tunga najmi ta kis'ehé ra nki ni xi kits'ín.

18 Jun najmi b'a kamat'on xi nkú nga kamat'ain xuta Israel. Kui xi ngjik'úhun nku asunntu tjennki xi tijná ei asunntej, xi kis'ejña ndzjen ndzjen nga kití, má nga kama nistjen nistjen ko kis'ejyún ko ntjo kama.

19 Ko kinu'yá tjio ko nku nta xi kinchja. Xuta xi kint'é nto tsanki nga najmi ta kuinchjako saha ra,

20 at'aha najmi tsichukjuaha kjuatexuma xi b'a títuu: “Santaha ko chu xi kuasint'a tsuku asunntu tjennki tjihín nga ndjio s'ehé.”

21 Tu ni xí nkjúhún tjín ni xi kama chjiu nga santaha Moise: “Tíb'atsé nkján”, kitsú.

22 Tunga máha jun, tsankink'úhūun Asunntu Tjennki Sion, nanki xi ts'e Ntíaná xi tǐjña tǐk'uun, nanki Jerusalen xi tǐjña ndjiojmi ján, má nga kama ñjakú nkjin nkjún ntítsje xi títs'ínstjohō Ntíaná,

23 má nga kama ñjakú xi tjun kama ntíhī Ntíaná, xi tǐjntut'á j'áihīn ndjiojmi ján. Tsankink'úhūun Ntíaná xi kuasehe mí nihi xi kits'ín ngayjee xuta, má nga tǐjntu animaha xuta xi naxu kits'ín, xi ja kama xi tǐjhin nga kama.

24 Tsankink'úhūun Jesu xi kits'ínchjéhen Ntíaná nga y'enda tsetse nku ni. Kō tā tsankink'úhūun jní xi kisaténdzjoo, kui xi bakú chubayaná ni xi 'yún nda sa nga xi tsakú chubaya jníhī Abel nǐstjin nk'ie.

25 Chúhūun yjonuu. Najmi tu n'e t'axíun xi tǐnchja. At'aha yaá nga najmi tsitjunki nǐstjin nk'ie xuta xi kits'ín t'axín xi ndjá kinchjakohō ei asunntej. Kui nga, ¿nkú ts'ín kuitjunkihiná ñá tsa najmi n'esihiín xi tǐjña ndjiojmi ján xi ndjá tǐnchjakoná nd'ai? Kui xi Ntíaná.

26 Nǐstjin nk'ie ntaha Ntíaná kits'ínk'atsé t'anankiu, tunga nd'ai tǐtsuya tǐtjun ni xi ts'íin nga b'ǐ tǐtsu: “Nku nǐyá ts'ínk'atsé sa t'anankiu kō santaha nk'a ján.”

27 Nk'ie nga “nku nǐyá sa” tǐtsu, kui xi tsuhū ra nga chjúxin ni xi kin'endoo, ni xi mahā f'ajniyá, tu xi b'a ts'ín s'entuhu ni xi najmi mahā ra f'ajniyáha.

28 Najmi ma f'ajniyá má batéxuma Ntíaná, kō kui xi n'ekjáihīn. Kui nga tjeheñ raá máb'achjǐhī Ntíaná kō n'etsjohó xi nkú ts'ín sasíhīn nga 'yún chankjáán.

²⁹ At'aha Ntjaná, kui xi nkú joyaha nku nd'í xi ts'ínkjejye tu mí nihí ni.

13

B'i ts'ín tís'ejña chji xi nkú ts'ín kuintsubaá

¹ Tehente b'i ngján n'etjó xinkiu, at'aha nkuhú maha Na'minuu.

² Najmi tu n'echayo nga nda ts'ín n'ekjóhōon xi k'juáisenuu ni'yanuu, at'aha tjin xi kits'ínkjáihin ntítsje ni'yaha nga najmi be tsa ntítsje xi j'aisehe.

³ Tjantaha ruu yjonuu xi kjintuyá'yún, xi nkúhu tsa kō tā jun kisuntuyá'yúnkōo. Kō tā tjantaha ruu yjonuu xi kjuanimā tíf'ajin xi nkúhu tsa kō tā jun b'a tímat'on.

⁴ Ngatento chankjún kjuabixoon, chankjún xi tintsubaqōo, at'aha Ntjaná ts'ínkōkjua xi tjin xi kjuájñakō nga najmi kjeē bixan kō xi k'uat'aha xinkjín.

⁵ Najmi tu tōon n'e mjo. Katumahanuu ni xi tjinuu. At'aha b'i kitsú Ntjaná: “Ndahachí najmi k'uejñaha kō tā ndaha najmi ts'in nga maha.”

⁶ Kui nga ma k'aán nga b'a bixíhinná:

Ntjaná basinkona,
najmi tjin ni xi kuinchánkjúnna.

¿Mí nihí xi kama ts'ínna xuta?

⁷ N'ekj'áítsjohōon yjonuu já k'aku xi kis'enuu, xi kitsúyanuu éhen Ntjaná. N'enkjíntak'un xi nkú ts'ín y'entu kō xi nkú ts'ín jet'a nistjihin, kō b'a ts'ín tā n'e s'ejjun Ntjaná xi nkú ts'ín kis'ejihin Ntjaná.

⁸ B'a ts'ín tjiyaha Jesucristo nk'ie xi nkú ts'ín tjiyaha nd'ai, kō tu nkú b'ahá ts'ín s'eyaha.

⁹ Najmi tu 'bainto tsa tjín xi k'uanachanu nga kuakúyanuu kj'aí kj'aí ni. Nda tjín nga sakú nga'yúhún animaná ajin kjuandaha Ntíaná, najmi ajihín kjuatéxuma xi tsjá xuta xi b'a tsu nga nichinee sakújinná nga'yún. Ndahachí najmi basinkoná kui nii.

¹⁰ Nginkun Ntíaná tíjñaná nku nāchan chje. Yaá nga tíjña nkjúhún já nā'mi xi ts'ínxát'ahā nínku najyuntee nga kjine chje xi s'ejñasun nāchan chjená.

¹¹ Tíjña nga ndā nā'mi tíjjuun fas'enko jníhi chu ante xi 'yún nkjúhún nínku najyuntee nga tsjá chje tu xi n'endyjat'ahā rā ngatitsuhún xuta, tunga najmi máhá tjintu xuta s'etí yjonintehe chu. Natsin ní s'etí.

¹² Kui nga un kiekehe rā Jesu natsin nantio, tu xi jníhi kits'ín jekoho xuta.

¹³ Kui nga tjihinsehe raá Jesu natsihin nantio ko kasakúná kjuasuba xi tā kisakúhu.

¹⁴ At'ahā najmi tjinná ei nku nanki xi tíjña sín. Nanki xi s'ejña ní askahan tjenkiá.

¹⁵ Kui nga tehente n'etsjoho raá Jesucristo, a jahá Ntíaná tín'etsjoho nga b'a tín'eé. Kui xi chjená. Katitju tsu'baá nga Jesu xi Ntíhi Ntíaná.

¹⁶ Ko najmi tu n'echayo nga n'oo ni xi nda ko nga b'i ngján tisinkoo xinkiu, at'ahā tā sasihin Ntíaná chje xu'bi.

¹⁷ Tinú'yá'óhoon já k'akunuu ko chanjkún, at'ahā kui xi basehe nga n'oo ni xi tjihin nga n'oo, ko tjihin nga ts'íinkjas'ehe kuenta Ntíaná. B'a n'oo tu xi tsjo k'úehe rā nga ts'íihin xáha ko najmi aí kamahā xoo, at'ahā tā ngandanuu tsa najmi aí kamahā xáha.

18 Nk'ie nga chubakoo Ntíaná, chubantjáiñi. Ndahá tjiya kjuankjintak'unní nga tín'ei xáni kó mjeni nga tu nkú ndahá n'ei.

19 Chubantjáiñú nginkun Ntíaná nku kjuanda, tu xi tsjante xatíhina Ntíaná nga kfínsenuu.

Nda xi kits'ínnda xujuin b'i ts'ín títs'ínkjet'a

20 Ntíaná xi tsjáná kjuajyu, kui xi kits'ínkj'áíya ngáha rá ngabayoo Nda Ntíaná Jesucristo. Kui xi Nda bastu chánkaha chutsanko, at'aha jní xi ts'e y'éndakoho Ntíaná ni xi najmi maha fe.

21 Ntíaná katsjánuu ngayjee ni xi nda xi machjénuu, tu xi kama n'etjusuhunnu ni xi mjehe. Jesucristo kats'ínchjén nga katuma ajinná ni xi sasíhín. N'ekié yjoná nga tíhín kjuachánka Jesucristo santaha tu nkjéhé ni. B'a katuma.

22 Jun já nts'e, tíbankinuu nga nda n'ekjóhooon én xi tíb'et'ánuu ei nga títsjaniyánuu, at'aha najmi 'yún tse ni xi kuakiet'á.

23 Mjena nga choo nga ja tsitju'a nubayoo nda nts'eé Timoteo. Tsa kjuáise xatína, kfínka kó kui nk'ie nga kfínsenuu.

24 Tífaniñaha ngayjee já k'akunuu kó ngayjee xi kikj'áts'ehe Ntíaná. Xuta ante Italia tá tífaniñanuu.

25 Ngatentoó kas'enuu kjuandaha Ntíaná.

Éhen Ntíaná
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

e05183c2-7c34-5cdd-8c78-15ea51bd8cbb